

Osobito su velike mogućnosti lova u Drinskoj banovini: tu ima srna, divokoza, zecova, divljih pataka, divljih gusaka, tetrebova velikih, lještarki, trčaka, brdskih jarebica (kamenjarka), šljuka, fazana, prepelica i divljih golubova. Zatim medvjeda, divljih svinja (veprova), vukova, jazavaca, kobaca, ušara, sova, vrana, svraka i čavki. Obavještenja za lov i ribolov: »Putnik«, Sarajevo.

Izleti i šetnje. Strme planine, bogate šume i divlje gorske vode, ukratko romantična subalpinska priroda najbliže okoline Sarajeva, daje odličnu priliku za veoma zanimljive izlete. Čak i oni koji nijesu osobito vješti turističko-alpiskom sportu, nalaze ovdje velik užitak, jer se svi ti izleti mogu izvršiti uz veoma neznatan napor. Veličanstveni vidici, koji se mjestimice pružaju čak i do Durmitora u Crnoj Gori, najbolja su nagrada turistima, koji imaju smisla za prirodne ljepote. Od mnogobrojnih izleta koje pruža Sarajevo kao polazna tačka, navješćemo ovdje samo nekoje najzanimljivije:

Na Trebević (1629 m) sa šumarskom kućom na 1100 m i planinarskom kućom »Aleksandrov dom«, vlasništvom Društva planinara u Bosni i Hercegovini na 1629 m. U domu se može dobiti hrana i stan. — Na Jahorinu (1913 m), prilaz sa želj. stanice Pale (800 m); kod Vukeline Vode (1688 m) nalaze se dvije planinarske kuće za 30 osoba. Hranu i pokrivače treba uzeti sa sobom. — Na Vodopad Skakavac iz Koševo ulice. Planinarska kuća za 30 osoba. Hranu i pokrivače treba uzeti sa sobom. Na Igman (1595 m) i Bjelašnicu planinu (2067 m) sa želj. stanice Ilidže, kroz aleju, koja vodi do vrela Bosne, zatim u lijevo na Igman. Na Velikom Polju svršava se Igman i počinje Bjelašnica; put se nastavlja dolinom Grkavice i penje se do vrha Bjelašnice. Tu je poznata meteorološka stanica. Prenočište. Hranu treba uzeti sa sobom. — Na Pale i Romaniju planinu (1647 m). Do Pala željeznicom ili autom kroz veoma zanimljivu dolinu Miljacke. Pale je poznato uzdužno lječilište i stanica za zimski sport. Iz Pala na najviši vrh Romanije, Veliku Stijenu. — Na Treskavicu (2028 m), s planinarskom kućom (10 kreveta). Hranu i pokrivače treba uzeti sa sobom.

Lijep je malen popodnevni izlet na Žutu tabiju (Višegradska kapija), odakle puca krasan vidik na grad Sarajevo. To je panoramska slika, koja se čovjeku duboko usijeće u dušu do groba. Kod žute tabije turska kavana.

Sarajevo ima izvrsne željezničke veze s inostranstvom i s Jugoslavijom preko Gruža (Dubrovnika), Metkovića, Hercegovoga, Bos. Broda, Banjaluke.

Autobusne linije: Sarajevo — Mostar — Dubrovnik; Sarajevo — Zvornik — Bijeljina — Brčko; Sarajevo — Zvornik — Tuzla — Brčko; Sarajevo — Pale; Sarajevo — Kalinovik; Sarajevo — Kiseljak — Fojnica.